








H. 2555.- Contre Les Jesuites
"fourrés de malice et ayant des
âmes espagnoles". Ecrit par un
protestant.











1691

21^e Jan. 1712. 307

LE
CATHOLIQUE
REFORMÉ.

*Le frere trahira le frere pour le faire mourir, & le
pere l'enfant, & les enfans s'esleueront contre
leur pere, pour le liurer à la mort.*

*Et vous serez hays de tout le monde à cause de mon
nom: mais qui aura perscueré iusques à la fin,
celuy-là sera sauvé.*

S. Marc. Chap. xiiij.

M. DC. XXI.

1841

Case 1841

F 39

326

762/c

CATHOLIC

RECORDS

THE NEWBERRY LIBRARY

CHICAGO

1841

Chicago

M DC LXXI

LE CATHOLIQUE REFORME.

Vous sçez hays des Rois, & les plus puissans de la terre vous auront en horreur. C'est vne prophetie tres-veritable que nous voyõs aujourd'huy familiere parmy nous, nous sommes en detestation au peuple, comme les plus abominables des creatures, mesprisez des grands & petits, & generallement exposez à l'opprobre, à l'indignité, & à l'indiscrete insolence des mutins, & contempteurs de la Loy de Dieu. & ce pour l'amour de la Religion; pour servir Dieu en esprit & verité, & pour ne nous vouloir point soumettre au joug de la beste, ny le Iuif, ny le Turc, ny le Payen, ny le More sans Dieu n'est point hay du monde comme nous. Hé pourquoy? pource que nous sommes de la Religion: pource que nous seruons Dieu, & ne voulons point marcher avec le fils de perdition.

La France est maintenant abreuuée, iusques en ses Prouinces les plus esloignées, de nostre misere: les ombres ont p'oré nostre affliction au milieu des Eglises Reformees, voire les plus distantes de ce Royaume: la

pitie a fait sçauoir la desolation de nostre
saincte communauté par toute la rondeur
de la terre, & les bons seruiteurs de Dieu ge-
missent de toutes parts, desplorans le pi-
toyable desarroy, & le triste mesnage qu'on
fait en l'Eglise de Dieu, prophanât la sain-
cte maison, demolissant son Temple, raua-
geant son heritage, exposant le troupeau
del'Eternel à la rage des loups, & le donnât
en proye aux dragons affamez, qui en despit
de Dieu assouissent leur cœur de la sub-
stance de ses propres aigneaux, qui plus est
le plus sensible, & pour comble de douleur,
ceux qui nous deuroient tenir la main, sont
ceux qui nous font plus d'extortions; qui
trop injustement soustiennent, maintiennēt,
& entretiennent ceux qui nous font tout ce
mal, les incitent à ce faire, & sous pretexte
d'en vouloir faire la iustice, les animent
contre nous, & les portent à vne rebellion
publique, afin de nous donner encore le
tort, & nous faire trouuer les autheurs de
tous ces seditions. Nous sommes muets
comme les aigneaux de la boucherie; Si
nous pensons faire nos plaintes, implorer le
support de ceux qui nous doiuent mainte-
nir, on nous accuse d'estre des mutins, & se-
ditieux. on nous fait prendre prisonniers,

5
 & nostre innocence sans aucune iustification est condamnée comme criminelle, & troublant le repos, ô tyrannie extreme! iniquité sans pareille! mais las! c'est la prophétie de l'Eternel.

On ne s'est pas contenté de nous auoir rauy le Bearn, d'auoir pollu nos Temples, de nous y auoir contrainct en la conscience, de nous y auoir interdict le libre exercice de la Religion, de nous auoir volé nos biens, violé nos droicts, de nous auoir forcé d'entretenir, de ce peu qui nous reste, nos propres ennemis: Le loup aura la brebis, & sa dépouille, le larron la bourse, & l'argent, & vous, vous aurez nos biens, & nos corps: mais vous ne toucherez point à nostre ame: Nous baillerons à ces perfides hypocrites, à ces traistres couuerts, à ces pestes enuennimées le suc de nos trauals, pour les nourrir à nous faire la guerre, comment, dis je, nourrir, puis qu'ils ont des reuenus comme des Rois? Las! quelle impieté? ils nous ruyment, mais non pas pour enrichir la Couronne Françoisse, ils la rendroient plustost enuahie. Ces conspirations Iesuistiques, ces conjurations Espagnoles domineront le sceptre Royal, s'ils viennent à bout de leurs subtiles & diaboliques inuentions. & ils y

ont desia bien commencé: puis qu'ils sçauēt
 bien auoir les cœurs & les corps de nos Rois:
 ha! qu'ils sçauront bien auoir leur sceptre &
 leur Couronne: Ils sont pour le party des
 Espagnes, non pour le support de la Fran-
 ce. O dangereux conseil, pour vne si belle
 Monarchie:

Ces bons Peres, qui semblent par le de-
 hors estre le vray type de la simplicité, sont
 fourrez de malice, & ayans les ames Espa-
 gnoles, ne peuuent procurer l'aduanacement
 del'Estat, ny le bien de la Republique Fran-
 coise: leur pernicious dessein est porté à la
 conspiration de la ruyne totale de ceste heu-
 reuse Monarchie: ils veulent par les esmo-
 tions & les guerres ciuiles, qu'ils taschent
 d'embrazer contre nous, par leurs pestilen-
 tieuses Predications, faire bresche à l'Espa-
 gnol, pour se jeter à la chaude au milieu de
 la meslée, & n'affectant party que le sien, dé-
 posseder nostre Roy de son Royaume, l'o-
 iter de son Throïne, & le reduire avec nous
 à la baguette blanche: Voila le but, voila
 l'intention, voila le dessein & l'attente de
 ces traistres hypocrites, de ces diaboliques
 double cœurs: de ces perfides & desloyaux,
 qui n'en veulēt point à ceux de la Religion,
 pour augmenter l'autorité du Roy, mais

pours'agrandir eux-mesmes : les parricides
qui d'un bras meurtrier ont trempé leurs
proditoires mains dans le sacré sang de nos
Rois, n'ont-ils pas esté ou Pensionnaires, ou
Escoliers de ces triples cornus, ou n'y ont-
ils pas esté solicitez par leur infernale sophi-
stie, enseignant que c'estoit vn acte pieux
de tuer vn Roy heretique, ou qui fauoriloit
l'heresie : S'il nous estoit permis d'aller re-
chercher dedans les Greffes la derniere dé-
position de ces desesperez, nous trouuerions
que les dernieres paroles de Rauillac
estoyent celles-cy : *Les Iesuites m'auoient pro-
mis & assuré qu'apres mon coup faict, les Anges
& la Vierge Marie m'enporteroyent en Paradis,*
& de faict, ceux qui se rencontrerent à vne si
funeste & deplorable occurrence, rapportēt
que si tost qu'il eut ouuert le sacré sein du
Roy, il se voulut eslancer pour voler, pensāt
que ce que ces traistres meurtriers auoient
dict seroit veritable : non seulement le co-
gnoistrions nous par les dernieres paroles de
ce miserable, ny par l'Arrest donné contre
eux en leur bannissement : mais en l'Epilo-
gique catastrophe de tous ces mal-heureux-
que la rouë a porté pour infamie à la posteritē
& c'est pourquoy ils sont si viuement
animez contre nous : pource que nous les

11
Eusons toujours de la haine
de nos Rois : c'est pourquoy ils veulent allu-
mer vne guerre contre nous, pensans nous
exterminer, mais c'est de ce dont nous nous
soucions le moins, leur iurant que volon-
tiers les premiers s'en pourront ils repentir.

On nous auoit promis de n'innouer rien
dans le Bearn, de laisser ceste affaire en sus-
seance, & n'en parler de sept mois : neant-
moins ces promesses sont retractées, cet Ar-
rest (il le deuoit estre, venant d'esi bonne part)
transgressé & on presse à sa Majesté que
c'est vn peché, voire des plus grands, de tenir
ceste parole, & qu'au contraire, c'estoit vn
œuure de grande pieté, que de violer sa foy.

Ces esprits enfumez, ces consciences ba-
zanées, ces diables desguisez, ces perfides
d'enfer, ces massacreurs de Rois, portent
ainsi publiquement de pernicious pece-
ptes, la mort de Chastel nous en est le tesmoi-
gnage & le seau. On ne s'est pas, dis je, con-
tenté du Bearn, de nous y auoir faict mille
vergōgnes, on a du depuis, ô cruauté inouïe!
ô manie furieuse, & enragée! sorty nos pau-
ures corps de la terre, troublé leur repos, &
violente nos cadauers. C'est vn Huguenot,
il le faut des-ensepulturer, il luy faut mettre
la corde au col, & le traîner par les rues
comme

9
 comme vn chien : Orage insensée ! ô furie
 Acherontide ! ô meurtrier courage ! : Ces
 barbares cruautéz nous ont esté faictes en la
 ville de Tours : & bien pis, on nous y a rom-
 pu nos cimetieres : on y a démoli nostre
 Temple, on y a faict brusler avec le toict la
 sacrée Bible, la sainte Escriture, l'Euangile
 & le Testament de Dieu, pensant ces enra-
 gez triompher de Dieu, triomphant de sa
 sainte parole : non contents de cela, las !
 quen'ont ils point faict ? le narré en est trop
 pitoyable, on a par-tout animé les seditieux
 contre nous, on nous a faict mille maux, &
 encore, hélas ! nous n'oserions ouurir la bou-
 che pour nous plaindre, pour que nos pleurs
 & nos souspirs peussent allegger nostre dou-
 leur. On en a mis prisonniers des nostres : on en a
 mis en fuite, & pour donner vn peu de couleur a
 leur barbarie, on y en a mis quelques vns des au-
 tres, qui ont esté publiquement enleuez : tout s'en-
 tédait bien. C'estoit dommage que cela n'arriuoit
 entre nous, le gibet eust suivi de pres la prison, &
 sans forme de procès on nous eust exemplairement
 puny. Hélas, vn bon conseil ne donnera-il point
 d'ordre à vn si pitoyable desastre ! le cœur me sei-
 gne, & n'ose dire ce que ie pense, *ne Vati noceat esse
 locutum.* Vn arbre bien gros est à la fin mis à terre,
 en ostant aujourd'huy vne branche, & demain
 l'autre.

Comment est-ce qu'on nous criminalise, pour

nous estre, par permission du Roy, assemblez à la Rochelle: on prend ce sujet pour s'animer contre nous, pour nous y venir forcer, & mettre tout au sac & à la cendre: on nous presse de nous separer, ce que nous ne ferons jamais, ce seroit tousiours à recommencer, & estre reduicts à semblable misere: C'est vn faire le faut, il en faut scauoir le court ou le long, on nous a assez amulé, autant qu'affligé, depuis la mort lamētable de Henry le Grand, d'heureuse mémoire, plus on attend, plus il ennuye, plus on remet, moins on est soulagé.

Si on nous menace de la mort, nous y sommes accoustumez, si on nous menace du feu, nous y auons passé: si on nous menace du cousteau, nous les auons essayez: la Seine n'est-elle pas encore toute rouge du sang de nos peres, Loire n'est-elle pas toute sanglante pour le massacre de nos freres: le Roine n'est-il pas encore tout empourpré pour la mort de nos ayeulx: les cendres ne sont-elles pas encore toutes chaudes de nos predecesseurs consummez: les chemins ne sont ils pas encore tous remplis des os de nos parens, qu'on a proditoirement massacrez, pour faire profession de la Religion Reformée, & ne vouloir point suivre les vestiges de l'Antechrist. Rien, rien, rendons les fleuves par l'abondance de nostre sang, comme le vermillon, mesprisons les feux, & les flammes, le fer & l'acier, le gibet & la rouë, pour la Religion, pour le seruice de Dieu, pour professer Iesus-Christ: car luy mesme dict, *qui m'aduociera deuant les hommes, ie l'aduocieray deua: & mon Pere qui est es Cieux: & comme au contraire à ceux que la tribulation, & la crainte de la*

II

mort aura fait descheoir de leur perseuerēce, il dict, qui me reniera deuant les hommes, ie le renieray deuant mon Pere qui est es Cieux: Qui aura honte de me confesser deuant les hommes, i'auray honte de le confesser deuant mon Pere qui est es Cieux: & ailleurs, Qui aime sa Vie plus que moy, n'est pas digne de moy.

On pense que pour ruynner vn membre, pour destruire vne ville, pour en faire mourir mille millōs, on exterminera tout le corps de la Religion: nous renaissons de nos cēdres, nous pullulons par nostre sang ces grands & cruels massacres de nos peres, ne nous ont point diminuē: c'est la cause de Dieu, l'Eternel en prendra la deffence, & nous maintiendra contre la rage de ses ennemis.

On nous veut faire la guerre, c'est vne chose assez manifeste: mais la pietē n'est point la principale cause de ce pernicieux dessein: car puis qu'on entretient bien des Iuifs & des Athees, on nous permettroit bien de viure en tout le Royaume indifferemment avec tout le public en vn commun deuoir, comme on a faict iusques icy: mais dautant que nous sommes directement bandez contre les atroces entreprises des sataniques instructions de cette sodomique societē: & que nous descouurons les ruses, les subtilitēs, les infernales astuces, & les antitheiques doctrines de cette communauté de Mammon: les publions, & dōnons a cognoistre aux simples ignorans seducteurs du peuple, on s'aigrist contre nous, craignā d'aller ou siours de pis en pis, & qu'a la parfin ilz ne peussent plus subsister contre la veritē: & apprehandant aussi de voir la marmite romaine renuersēe, pour la quelle maintenir

ilz se dressent effrontément contre dieu, & pour ce que nous soustenons son nom & deffendons la verité on tasche par vn antiphique conseil a nous destruire cōme les plus forts & lss plus puissants ennemis du Siege Apocalyprique.

Ces Viperes, ces Basilics, ces Tigres, ces Dragons enragés sont cause de tout le mal-heur, que nous voyons preparé pour affliger generallement toute la France, buttant principalement a nostre tana-thophagie comme lions affamés & voratifs: tenons nous fermes a l'arbre de la foy, & mettons toute nostre confiance & nostre esperance au Ciel, sans attendre secours du bras de la chair, car: *si Dieu est pour nous qui sera contre nous?*

Nous faisons profession de la Religion Reformee, que la torture le marryre n'y la gehenne, n'y l'horreur de la mort ne nous face jamais chanceler, n'y changer: ne craignons point le monde: n'y Empereurs, n'y Roys, n'y Monarques, n'y Princes, n'y toute vne populace animee de sedition: confessons franchement que nous sommes Chrestiens, & que nous endurerons plustost la cruauté de la mort, que renier Iesus Christ. Mais neantmoins fuions, & euitōs l'occasion le plus que nous pourons: que si d'aduenture il nous est impossible d'esquiver la rancontre, & d'empescher le choc creuons plustost que d'obeir: embrassons plustost le tombeau que la misericorde, & monstons nous cōstans au trepas pour l'Euangille de Dieu! Dieu est mort pour nous ne sommes nous donc pas bien obligés de mourir pour luy? Nous retirer la teste beslee sans espoir & avec honte, nous estimans encore bien heureux

d'auoir cette grace, & cette liberté apres nous auoir iniustement declarés criminels de leze Maiesté : abus:abus il n'en ira pas ainsi : ou nous serons punis, rons iustificiez : nous aurons tout ou rien.

Nous auons mis la couronne sur la teste d'Henry **xiii**. deffunct, & de glorieuse memoire: (la France le scait): nous donnerons le Sceptre a Louys **xiii**. Dieu nous en fera la grace, pouuant plus, & estant plus forts qu'on ne nous pense: mais loing, loing la faueur: loing ces mignons de fortune, & ces celibes courtisans: loing, loing ces consciences encapuchonnees: elles ont assez, & trop, a nostre grand regret, assoupi les sens de nostre Atlas par leurs venefiques sortileges, preoccupant la plus noble partie de son intellect.

Nous ne voulons point nous rebeller contre le Roy, & encore moins voulons nous aller contre la volonté de Dieu, n'y permettre qu'on aneantisse nos anciens priuileges, nous ne le permettrons pas & qu'on ne trouue point estrange si nous nous y opposons de toutes nos forces, car nous ne souffrirons iamais qu'on nous mette le cousteau a la gorge sans y porter la main. Or si nous prenons les armes sera pour restabli le Roy souuerainement sur son Throsne, pour commender absolument a son peuple & couperons broche au mal qu'on pense appareiller pour nous, & si nous bataillons, en nous deffendât, sera pour maintenir la foy de l'Euangile, & pour conseruer l'auctorité du Roy, quoy qu'on se couure de son manteau Royal pour nous assaillir, mais tout vient d'un meschant conseil.

Nous craignons Dieu, & honorons le Roy.

Quelle pitié? tout le monde est animé contre nous, & mesmes il s'en leue parmy nous, qui nous veulent trahir, patience, Dieu soit loué, & face tout pour la gloire.

C'est vn crime, aujourd'huy, que d'estre de la Religion: mais ce crime là est agreable à Dieu, il n'y a empereur, il n'y a Roy, il n'y a Monarque, il n'y a Prince, il n'y a Seigneur: bref il n'y a personne à qui nous deuions obeir contre la Loy de Dieu. Si on tuë nostre corps, on ne peut pas faire mourir nostre ame. On nous en veut, & de longue-main, tout ce qui s'est passé n'ont esté que des ruses pour nous attrapper: on nous refuse les charges publiques, on nous deffend le commerce commun, on transporte nos eslection, on nous rogne nos priuileger; & on nous voudroit volontiers contraindre, si on osoit, à faire banqueroute à Dieu, & à la Religion: mais plustost mourir, que faire tort à nostre ame, nous ne le ferons iamais, plustost mourir, plustost, plustost mourir de mille morts, que violer la foy que nous auons promise à Dieu. Les trois enfans ont mesprisé Nabuchodonosor & ses flames: Le Prophete Daniel n'a point craint la rage des Lions, laissons nous plustost arracher le cœur vivant, que fléchir le genoüil deuant Baal, laissons nous plustost precipiter dans la gueule beante des fournaises ardentes, que d'enfraindre nostre Loy, & renier nostre Dieu, & pour tous les traistres, les tiedes, & les mal-heureux qui se pourroiēt trouuer parmy nous, fussent-ils des plus grands, des premiers, & des plus puissants, voire mesme fussent-ils pere, mere, frere, sœurs, ou plus proches parens, ne perdons

15

point courage; Iesus-Christ en sa compagnie trou-
ua bien vn Iudas. Mourons, mourons courageuse-
ment pour soustenir la querelle de Dieu, afin qu'au
bout de la course, & apres auoir combatu le bon
combat, il nous puisse receuoir & couronner en
son Paradis, de la Couronne incorruptible de gloi-
re, pour chanter perpetuellement son honneur &
sa grandeur, avec les Anges & les bien-heureux, au
siele des siecles. Ainsi soit-il.

F I N.

Quelle pitié, que pour dire la verité il faille celer
son nom, & ne s'oser declarer de peur du supplice.

Veritas odium parit: & supplicium.

Handwritten text in a cursive script, likely from a 17th or 18th-century manuscript. The text is arranged in several lines and is mostly illegible due to fading and the angle of the page.

Handwritten text in a cursive script, likely from a 17th or 18th-century manuscript. The text is arranged in several lines and is mostly illegible due to fading and the angle of the page.

